

駐

粵

八

旗

志

營兵一千設遊擊一員守備一員千總四員把總  
二員遞相管束省城西北有花山界連南海番禺  
三水清遠從化五縣境層巒疊嶂藏匿盜賊頻出  
爲民害永譽命官督親軍及綠旗兵由炭步橫潭  
兩路分進剿平雙對岡盤古嶺諸巢窟用舉人黃  
士龍之策與巡撫李士楨疏請增設花縣在任八  
載軍循其教民戴其恩二十七年調京授本旗漢  
軍都統

拜音達禮本蒙古烏魯特人其父和濟格爾始隸  
正白旗漢軍遂爲何氏順治七年拜音達禮襲其  
兄巴圖二等輕車都尉兼佐領世職康熙九年擢

任宣化鎮總兵官十三年調隨征福建總兵官吳逆之叛耿精忠據福建平南王尙可喜請增兵防守廣東遂與福建巡撫楊熙領兵來駐廣州康熙十五年二月尙之信據廣州省城叛應吳逆拜音達禮密與楊熙議疾引所部出城會合大軍返擊而之信已分布叛黨閉城守衛甚嚴拜音達禮遂馳馬奮矛斬關奪門出同楊熙率所部馳會大軍於贛州事

閩晉一等輕車都尉十九年藩難平授駐防廣州副都統撫輯流亡二十七年擢廣州將軍時駐防兵初到南北風氣水土異宜乃與前將軍王永譽副都統

魏赫訥勤加撫卹而藩下舊部廝養尙盤踞內城  
大市新城小市科索租稅爭攘幾無虛日乃命協  
領陳佐聖率兵按門稽察除安分良民外其稱藩  
下舊部者悉行驅逐四民遂安舊制每甲兵畜馬  
一匹例給芻豆銀不敷餵養且廣州食物昂貴旗  
兵生計維艱因

奏請每兵加給二匹馬乾銀兩以資津貼

上允所請三十七年六月卒于官

管源忠字形赤號鄴侯漢軍鑲黃旗人嘗於除夕  
值班崇文門日暮猶習射於城牆根某貝勒見而  
異之詢悉其名因聞諸當路由領催不九年擢

至副都統康熙四十一年授廣州將軍時連陽搖匪倡亂八旗官兵從副都統汪世臣往連州江口防守省垣稍空因設傳籤巡城法以爲夜防設兵役站街法以備日守宵小遂絕蹤旗民有互控者判決無少私次年有匪徒結黨燔掠新會之江門潮連外海等處提標兵不能剿捕督帥郭世隆謀於源忠欲令旗兵會剿源忠曰歲歉民飢刦掠時有遽動禁軍搔擾逾多第命一良吏持檄撫而賑之可無事也因令知府朱國甯前往如其策闔邑帖然四十六年丁未春

聖祖南巡河工源忠迎

覲於清江浦

行在所疊次

召見垂詢嶺南軍紀民情敷奏稱

旨

御書典戎羊城四字堂額及澄心如止水力學比登峯楹聯以優寵之五十二年歲大稔廣韶穀價騰踊

奏請暫借江浙漕糧由海運以濟軍民

上特命浙撫趙申喬馳驛來粵發庫帑會同將軍覈實按戶給予口糧凡半載餘全活甚衆雍正乙巳年逾八旬蒞將軍任二十有四載矣引年乞休得

旨回旗兵民跪送者盈道

石禮哈字節菴漢軍正白旗人前禮部尙書石文焯子也雍正四年由貴州威甯鎮總兵署貴州巡撫剿平狝苗有功擢廣州將軍十一月抵任值歲荒米價日昂乃遣員採買廣西米石接濟旗營自捐銀一萬兩充運脚費後因平糶積有羨餘遂仿社倉法於石馬槽東建立裕信倉買穀屯儲遇荒平糶按餉扣還隨時買補焉六年調補福州將軍蔡良漢軍正白旗人前漕運總督蔡士英之孫京口副都統蔡毓茂子也雍正六年由福州將軍調廣州將軍恐駐防子弟樂於遊嬉嚴飭該管各官不時稽察壯丁人等勿令出外閒遊咸使學習技

藝又廣州五方雜處最易藏奸乃編設保甲凡民人處旗境者其來厯眷口悉令填註門牌卽別旗兵壯暫居本旗地境者亦嚴其稽察由是姦宄斂迹逃人稀少又設立察事官一員領催四名月一更換巡察城廂內外如有旗人在外賭博立即擒治旗風爲之一變正紅旗甲兵蔡長泰妻賴氏青年守節奉侍孀姑良訪聞具題請

旌廣州旗婦守節

題請建坊旌表之例自此始焉是年九月卒於任奉

旨予祭葬諡勤恪入祀賢良祠

柏之蕃漢軍正黃旗人由世管佐領陞補叅領擢



馬耳人方志卷一四  
副都統歷任京口荊州仁浦涼州所在廉明白飭  
幹練有聲雍正十年授廣州將軍四月到任謂各  
協佐領

國家昇平既久習尚奢華近聞旗兵閒有荒棄本身  
技藝聚賭酣飲及在外與居民鬪毆諸惡習皆本  
管官失教之過令於每月朔望傳集官兵齊赴公  
衙門擇官學教習二人宣講

### 聖諭十六條及

聖諭廣訓滿漢文各一通語不在多務取詳明簡切使各  
有所警厲後因披甲人槍箭多未合法定立操期  
認真訓練躬親往視不數月咸著成效乃厚加賞

犒焉復令未有錢糧之壯丁各旗官擇其強壯者  
編爲餘丁學習技藝遇有甲缺選補每月列名呈  
報其餘力可貿易營生者聽之於是旗風漸返勤  
儉云

張正興漢軍鑲黃旗人雍正十二年由湖廣提督  
陞授廣州將軍接辦

奏准將八旗兵丁自雍正十年至十二年扣存馬乾  
銀六萬五千七百兩先以六萬兩交存藩庫其餘  
五千七百兩借給鹽商生息每年將所得息銀留  
爲修補軍裝等項費用又查得子母礮實爲軍中  
利器

奏請添設子母礮四十位每年十一月在燕塘隨同大礮操演又察兵丁往往困於借貸皆由風俗侈靡所致乃嚴定章程婚喪一從節儉於是官爲之倡兵丁咸知遵守焉乾隆二年調任福州將軍阿爾賽漢軍正黃旗人由福州將軍於乾隆二年調補廣州將軍抵任後察視軍械半皆破壞乃奏請撥帑修造鐵盔鐵甲二千餘副帳房一千餘架製造備極堅固又特開鐵局於金剛菴側用高州白麻鐵選工造腰刀就本身鐵爲吞口較舊刀加長數寸刀柄嵌團鶴銀絲其刃鋒利無匹在任五載精勤如一初至時印房承辦滿文每有錯誤乃

奏請印務處置隨印外郎八名卽於各旗官學生內  
考補如滿文熟悉公務勤慎者年滿咨部以縣丞  
選用焉八年調授兩湖總督

策楞滿洲鑲黃旗人由福州將軍調廣州將軍乾隆八年到任次年

奏言前任將軍石禮哈捐廉一萬兩買穀濟軍續已  
扣還現穀價昂貴請暫停採買將銀兩每年歲暮  
借給各兵以資度歲按餉扣還奉

旨允行又以旗營無水師巡防未密請如福州添設水師  
迨部議咨覆准行而策楞陞授兩廣總督遂移交

新任將軍經理焉

錫特庫滿洲正黃旗人由鑲藍旗蒙古都統調廣州將軍乾隆十年秋到任前任將軍策楞

奏請添置廣州水師旗營部議以海防重鎮水師爲要准設水師專營其舢舨船槳船俱由左翼鎮標分撥至添配旗幟礮械調撥教習一切事宜應令將軍副都統詳定覆

奏奉

旨允行遂與左副都統馬瑞圖右副都統安華悉心經理既選官派兵勘定巡防守泊處所惟旗人但嫻弓馬一切駕駛水泚咸所未諳乃調大鵬廣海水師弁兵來省教練朝夕親督學習不一載與綠旗水

軍會操有過之無不及矣二十一年調任巴里坤都統

李侍堯漢軍正藍旗人乾隆二十一年

廷議裁廣州漢軍兵之半調京旗滿洲兵千五百名補之時侍堯官戶部左侍郎

上特命爲廣州將軍赴粵新舊安插勿令失所乃與督撫議裁去之兵仍賞還扣存馬價並量其人口多寡加給遷徙銀兩又擇其壯健技藝可觀者分撥綠營拔補名糧其通曉文墨習熟官事者交鹽運司海關派各路稅口司役其前在旗境餘地蓋造房屋者許其管業居住又命協領舒九思分畫滿漢

地段一一皆經理協當焉八旗辦理戶口冊檔及一切文移筆墨之費向在各兵錢糧坐扣侍堯

奏請於籌備軍裝欸內按月賞給歲終報銷又

奏請將旗境毗連民舍房屋不便配給兵丁居住者悉交右司招租作爲八旗公用均得

旨允行尤嚴於肅伍兵丁滋擾市民立懲不貸民有脅訛旗人者亦委縣治之迨合駐諸事悉定旗民亦相安乃

奏請設立兩翼清書官學每旗挑選俊秀子弟五名入內肄業擇八旗領催兵內通曉清文者每翼兩人爲教習在右司公用房租內給與膏火茶水銀

兩由是滿漢八旗子弟咸知向學二十四年二月  
陞任兩廣總督

明福滿洲鑲黃旗人由乍浦副都統陞任廣州將  
軍乾隆二十七年七月到任在浙久轄水師熟諳  
風潮抵粵後查閱營伍以廣州水師旗營人數稀  
少半皆懸缺因

奏言水師兵缺有應滿洲挑補者惟滿洲兵至粵未  
及八年人丁頗少除選補馬甲外所餘多係幼弱  
請於漢軍壯丁內暫行選補將來滿洲得人再遵  
原奏滿漢合營庶免兵缺久懸操防可期嚴密水  
汛亦不至生疏得



旨允行二十九年任滿入

覲調任福州將軍

楊甯滿洲正黃旗人乾隆二十九年由陝西提督授廣州將軍衣橐蕭然僅蒼頭數人隨行赴粵人不知其爲將軍也蒞事明察批判案牘洞中機宜於公項出支分毫必覈先是八旗公費均出諸房租地稅歲入不滿千金甯閱須知冊內載將軍副都統有羣房餘房空地亦令添入冊檔交右司招租作爲捐差幫貼盤費以及將軍副都統繕修衙署之費並

奉明立案以杜侵挪後如其所請行三十二年奏調

## 回京

宗室增海乾隆三十三年由甯古塔副都統授廣州將軍時奉部文裁撤將軍標綠旗四營因疏請將漢軍馬甲二百缺改爲步甲四百缺別爲一營曰步軍統以協領操練刀牌長矛以備衝鋒得

旨允行又清察戶口虛實令各旗領催互相保結每月必委官考校兩翼清書官學生分別優劣以給獎賞三十四年二月調任

## 盛京將軍

特克慎滿洲正紅旗人乾隆三十四年任廣州將軍先是廣州駐防甲兵三千名每名畜馬一匹自

行餵養按月扣存馬價遇有倒斃卽將所扣馬價買補三十六年特克慎疏言廣州馬匹惟操演騎用其餘官差俱不用馬且地方寒熱不時易於倒斃坐扣兵丁錢糧買補未免苦累請將滿漢額馬三千匹裁減二千四十四匹每旗留六十四匹照福州例交各旗設立官圈合棚餵養其建造官圈搭蓋棚槽之費悉在存儲八旗預備買補馬匹項下動支奉

旨允行由是八旗皆創建官圈各兵如釋重負焉未幾卒於任

宗室永瑋承襲輔國公乾隆四十年授廣州將軍

時滿洲八旗來粵未久生齒尙稀兵多缺額乃

奏請以馬甲三百缺改養育兵四百名分養旗中鰥寡孤獨貧乏者其兵房分給貧戶居住餘皆招租充公向例春秋操演鳥槍打靶每季四十八次以爲過勞乃定爲十二次旗人有罪向付南海縣獄收禁至是乃別置監獄於旗境委弁兵看守復於署西偏建勵才書院專課清文選年十五以上聰俊者三十人肄業其中暇則兼課騎射四十四年九月調任江甯將軍

福增格字松嚴號老益滿洲正黃旗人乾隆二十四年由散秩大臣

盛京副都統授廣州將軍時滿洲八旗新調來粵不  
協水土疾病甚衆乃延醫施藥公餘之暇喜作字  
揮灑不倦二十七年調福州將軍四十四年再任  
廣州將軍時年七十餘逾年六月四日卒於任八  
旗爲位祀之

存泰乾隆四十八年由涼州副都統授廣州將軍  
值總督大閱旗兵之歲先期察驗軍械諸多敝壞  
訛各官知分藏各旗無典守專責乃卽前將軍石  
禮哈所建裕信倉改爲軍器庫委官專守由是甲  
帳一新焉五十二年福建臺灣匪首林爽文作亂  
奉

旨命廣州滿洲副都統博清額領滿漢官兵千五百三十員名赴臺聽調乃會同巡撫圖薩布選擇官兵圖薩布取身材碩大者存秦獨曰臨陣在有膽不在有力領隊貴精詳不貴慙猛於是所擇協領瑪克什布伊清阿葉集鳳三員皆印務左司首領佐領札爾虎敏泰王南炳陳世俊四員皆在印務掌理文案兵則取火器嫻熟誠樸耐勞者迨次年凱撤人稱戰新店克彰化破番社廣州旗兵之功爲多云五十四年入都授正黃旗漢軍都統

善德駐防西安滿洲鑲黃旗人由馬甲從征金川積功洊補協領擢護軍統領乾隆五十四年任廣

州將軍以爲廣州濱臨大海陸無平原不藉馬隊  
惟以槍箭爲要乃教兵習過堂槍用五人循環遞  
進又選七八歲童子教之步隊燃槍操演遇大雨  
候至弗使退卽於雨中燃槍曰戰而遇雨退則必  
敗平時弗習安足恃也舊例仲秋北郊烏槍打靶  
仲冬燕塘演礮乃令合而爲一令烏槍兵於仲冬  
赴燕塘每日隨礮操演以習勞五十七年任滿入  
都旋卒

福昌字煥堂滿洲正白旗人乾隆五十八年任廣  
州將軍時滿洲丁少馬甲空缺凡二百有五乃  
奏請將空缺馬甲二百改爲副馬甲四百給家口衆

多而人材健壯者滿漢各選補二百一轉移閒不費公帑銖黍遂添多兵焉水師旗營左翼滿洲兵前因乏人挑補將軍明福

奏准暫以漢軍充補而協領及左翼佐領防校等官仍係滿缺未諳營務乃復

奏請於漢軍人員內久諳營務曉暢操防者選補將來滿洲得人再復舊制從之又添設漢軍孤貧錢糧以養旗中之鰥寡孤獨至今猶沾其惠焉

宗室崇尙承襲輔國公嘉慶三年由鑲黃旗蒙古副都統授廣州將軍時金川逆酋作亂憑礮據險大兵用雲梯奪取堅礮兩金川乃平



上命各省駐防將軍等選兵學習崇尙乃擇地建礮樓造雲梯令滿漢兵及水師兵之趨捷勇敢者數百人配以金鼓槍礮分班學習數月閒登緣捷疾往閱之大加賞犒焉四年奉部文准駐防子弟在該省應童試先由將軍驗看騎射後右司咨送府考學政案臨另分旗籍五六名取進一名附入郡學因念各旗子弟未嫻時藝乃設立義學聘粵中品學素優之士訓授詩文躬臨考較明年庚申學使取錄高天福文通等五名各頒冠服以榮之又保薦正黃旗滿洲防禦七十九選補直隸懷安營都司正紅旗滿洲驍騎校額爾登布選補直隸三屯協

守備文武兩途咸獲鼓勵五年八月以年屆七十  
力求解任回京

宗室書敬由左都御史授廣州將軍嘉慶六年蒞  
任點驗軍裝見各兵鳥槍日久頗多損壞乃籌款  
開局選工精造官槍分給各旗演習七年惠州歸  
善縣匪徒陳亞本與博羅鉅盜陳爛屐四結黨四  
出劫掠歸善博羅永安三縣地踞羅浮山冲虛觀  
爲巢穴御史交章劾總督玩寇書敬於是督旗兵  
六百往惠提督黃標乃亟進兵先破羊矢坑擒陳  
亞本戮於市又擒爛屐四於馬鞭坑斬之賊黨遂  
平乃振旅旋省未幾卒

馬方一  
宗室慶怡號頤園承襲奉恩輔國公

內廷行走嘉慶八年任廣州將軍政事務存大體其校閱操演軍士悉令佩刀城門堆卡值班兵弁亦必佩刀迎見每屆孟冬更換大關澳門監稅旗員必擇防校中之極貧苦者委之請託不行九年冬任滿入

觀仍回原任旗俗益加整頓後以病解任去

慶溥鑲黃旗滿洲大學士尹文端繼善子嘉慶十四年陞授廣州將軍時值海寇蔡牽餘黨鉤連土匪行劫外洋總督百齡下令封江禁市舶出口斷其接濟賊大飢窘遂內犯省河有紅旗幫張保最

强香新東順諸邑時遭焚劫總督議調兵剿之慶  
溥曰寇航多至百帆非旦夕可撲滅也聞張保有  
意乞降招撫爲便十五年三月九日撫局成總督  
率親軍數人赴香山受降張保領其全夥獻船械  
軍裝海氛遂靖又因漢軍丁口繁盛會同督撫  
奏請將藩庫存儲八旗各兵馬價穀價共銀四萬六  
千二百餘兩發交鹽典二商每兩一分二釐生息  
增設無米養育兵一千一百一十一名每名月給  
銀五錢於漢軍閑散中選年力精壯技藝可觀者  
充補並隨同甲兵一體訓練疏入得

旨准行於是軍威益壯焉旋內

召返京

福會滿洲鑲黃旗人嘉慶十六年由杭州將軍調任廣州時洋盜郭學顯張保鄭一嫂各巨股後先投誠奉文隨地安插而匪黨衆多任意逗遛聞有連結土匪在內河搶劫及擄人勒贖者適奉

上諭廣州將軍節制全省陸路鎮協各營著爲令乃留心訪察洞悉土匪強橫屢劄飭營弁整備卡汛增兵梭巡焉十六年與副都統那麟泰張秉樞

奏請廣州駐防出缺退老兵丁仿杭州駐防例賞還扣存馬價銀一十八兩以補缺兵丁分年扣存其陞遷及緣事革退者不賞部議如所請行十七年

九月任滿入都署理正白旗漢軍都統

本智蒙古鑲白旗人由察哈爾副都統擢廣州將軍嘉慶十八年履任嚴重寡言事必覈實僚屬憚之在任六載整飭旗規申雪疑案有神明之稱後引年乞休

孟佳滿洲正白旗人道光元年由鑲紅旗漢軍都統授廣州將軍因旗兵窮乏遇陞轉赴都川資無從措辦乃與總督阮元議於藩庫存儲馬價項內提銀一萬兩發鹽典兩商生息凡旗員驍騎校筆帖式等官送部引

見及文武舉人會試每員名准給資助銀三十兩俾資盤

費報部開銷奉

旨允行八旗至今利賴之最惡賭博旗境有卽懲治並閭里中之鬪鷄鶉蟋蟀者皆絕跡焉

宗室果齊斯歡嘉慶七年壬戌科進士改庶吉士道光五年任廣州將軍善射工書性謙抑以騎射詩書禮法訓誨八旗政務之暇與諸名流閒爲雅集聞番禺羅岡洞梅花三十里遠勝銅坑遂於燕塘演礮撤營後簡招諸同好往遊凡二十有三人賦詩成帙題曰香雪集總督阮元爲之序在任二載六年調福州將軍

慶保號蕉園大學士尹文端繼善子由部曹洊擢

封圻歷任兩湖閩浙雲貴總督道光七年由熱河  
都統調廣州將軍時旗倉米色霉變不堪食乃與  
督撫會議令三十四州縣歲解旗米者務乾圓潔  
齊否則以俸米二成搭放兵米八成上下稱便出  
東門十里曰燕塘向爲將軍仲冬演放大礮營地  
周廣十餘里前將軍李侍堯立有界址碑記日久  
爲土民侵作集場竹塢因命理事同知會同番禺  
縣令按舊址勘定四至勒石爲界始復其舊又閱  
旗丁有才武而無名糧者甚多蓋出缺之家前官  
每以養贍爲虞多擇其子弟頂補察知其故疏請  
於藩庫存餘雜欸借撥銀八萬兩發商每兩一分



生息家口衆者量給養贍奉

旨允行由是前弊盡除選補得人而出缺之家口亦不至失所尤愛惜人材士苟以一藝名輒優禮之後以年老致仕

哈豐阿滿洲正黃旗人由健銳營前鋒校起家隨將軍額勒登保剿蕩川楚教匪又隨大學士揚威將軍長齡平定回疆道光十三年任廣州將軍每值操演必匹馬閱隊察視槍礮馬步各行列教之橫衝夾擊諸方擇其尤者優加獎賞稍次者訓飭之未嘗鞭撲一人又以旗營僅有烏槍兵千一百名未能擊遠乃與兩副都統共捐銀千六百兩造

辦臺礮一百尊疏入奉

旨於海關庫動支毋庸捐廉時有洋人戰船數艘闖入虎門內地卽往告總督盧坤曰洋人窺伺中國得尺進尺得寸進寸其狡態也若不執法以斥之陳軍旅以威之恐異時海邦無甯宇矣總督猶豫未決乃歸大整水師盛張軍容命右副都統左廷桐領赴黃埔烏涌聯航屯扼旌旗炫日金鼓盈江洋人震懾急颺帆遁又明年調任黑龍江將軍

蘇勒芳阿駐防成都滿洲正黃旗人道光六年回疆張格爾之亂時以涼州副都統從征十五年陞授廣州將軍每選補兵缺置六力弓於前弗能用

者人物雖健勿選也暇則親臨兩翼官學考課諸生繙譯能者優獎謬者親爲改削因念漢軍生齒日繁無錢糧壯丁多至千餘而藩庫向有旗兵扣存馬價銀數萬兩乃

奏提一萬兩發商生息添餘兵一百名月支餉銀一兩滿洲二十名漢軍八十名隨隊操演以資防守而贍困窮疏人得

旨准行後與副都統孟魁意見不合孟魁撫拾罪欸入奏

上命左都御史寶興來粵察訛各情皆屬細故然未能和衷共濟殊失大臣體覆

奏奉

旨交部議處降一級調用旋授西甯辦事大臣孟魁降爲二等侍衛遂各解任去

阿精阿前任廣州將軍蘇勒芳阿從子也道光十九年由甘肅提督擢廣州將軍簡閱卒伍輒謂僚屬曰庶矣哉閱散壯丁滿洲竟有五百餘漢軍多至二千餘月領錢糧幾何烏足贍生哉貧乏可念人才亦可惜也二十一年洋人藉端生釁四月五日潛從坭城直逼北門乃躬率將士登城疊施大礮攻其前隊令旗兵分隊出城堵截擊斃洋兵多名迨和議成後詳閱省城周遭計一十二里有奇

安設大礮二百九十六位而八旗僅礮手二十四名實不足用又察海疆之地用馬無多現每旗養馬六十匹合滿漢八旗計馬九百六十匹乃請再裁四百六十匹將每月草料銀八百二十八兩改作口糧增設礮兵四百名專習火器輪守城垣於邊防大有裨益疏入奉

旨允行旋以年老乞休

穆特恩號鑄農滿洲正白旗人由健銳營前鋒校游擢至青州副都統道光丙午陞授廣州將軍二十九年冬粵西寇起乃籌戒備練火具簡銳卒千六百人爲備戰營以便調遣咸豐甲寅紅匪起東

莞踞佛山乃分銳卒營於東西郊率甲士登陴陘  
守五月賊逼江村省城戒嚴因令旗紳選義卒千  
五百人備衝剿搜內奸賊諜悉獲民心大安六月  
賊巢於蕭岡石井間命增兵永康臺以守爲戰二  
十六日賊傾巢來撲臺官兵奮力擊之賊不得進  
復分隊犯西關以牽掣我師乃令旗勇作十隊分  
路迎擊城上連發巨礮斷其交衝我兵從旁蹂躪  
之遂大破賊方賊之攻城也西村土匪亦爲之應  
援或欲剿洗其村持不可曰叛者無幾遽令無辜  
良善皆受戮是驅之從盜也事乃止十二月賊竄  
珠江南岸復派兵勇渡河擊之三戰皆捷斬林光

隆於小港賊黨胥平時齟齬遍野自出俸金令防禦馬連邦檢埋之又於雙山寺延僧建醮爲文以祭陣亡官兵而八旗餘丁大小四十八戰著績甚多無從鼓勵遂與督撫會

奏添餘兵二百名每名月支餉銀一兩以示

恩獎得

旨准行六年卒於任

穆克德訥駐防西安滿洲鑲白旗人咸豐七年任廣州將軍先是洋人逞難用礮轟擊城中五閱月弗爲動乃退出黃濬口潛造攻城之具穆克德訥察知敵情密爲之備是年冬洋人詐稱曬貨乞入

珠江督帥葉名琛許之十一月十三日洋人忽發  
礮攻城一晝夜閒礮丸迸落如雨東北一帶城無  
完堞次日黎明洋人蟻附登城旗兵拒戰死者相  
枕藉外無援軍洋人遂踞粵秀山十一月二十三  
日洋目迎將軍巡撫至粵秀山寺多端需索將軍  
厲色拒之復執大義以曉之洋人稍懾堅求代  
奏許仍通商乃與之約靜以待

命八年撫局未定省垣居民舖戶遷徙一空惟穆克德訥  
與巡撫柏貴率旗兵數千坐鎮維持全局九年四  
民始復業焉同治元年入

覲途次武昌因病乞休



瑞麟號澄泉滿洲正藍旗人前文淵閣大學士同治二年由熱河都統遷廣州將軍遇事鎮靜理煩耐勞無疾言遽色時庫欸支絀糧餉積欠甚多狡黠者往往糾衆譟餉不受彈壓既密察得實斬三人鞭四人由是一軍肅然未幾兼署總督巡閱周城見北郊礮臺圯毀亟令修復完固城垣狹窄令用三合土加築寬厚又察知有八千觔礮八十五位俱已缺耳乃自出新意作小泥範令匠人依法完補兩耳如舊可用又念旗人騎射火器雖精而擊刺拳勇亦所當習乃延川陝武師數人擇壯丁之強健者數百人分棚學習優加獎賞同治初元

復開文科知會試者資斧維艱乃籌款各加給川資四十兩又設立書院厚具脩脯延請名儒主講復籌款生息

奏請給與京職旅費及撥給八旗貧戶養贍家口後實授兩廣總督同治十一年晉補文淵閣大學士復遷轉文華殿大學士仍留兩廣總督之任十三年八月卒於任

賜諡文莊

駐粵八旗志卷十四終

駐粵八旗志卷十五目錄

人物志

歷任副都統列傳

牛 鈕

汪世臣

何天培

陳 昂

吳如譯

馬士傑

毛克明

曹 瑞

博清額

和興額

黃文璟

善 保

成 德

成 瑞

花沙布

左廷桐

宗室英隆

裕瑞

官文

烏蘭泰

庫克吉泰

駐粵八旗志卷十五

牛鈕姓他塔喇氏康熙三十四年由一等侍衛擢任廣州右翼副都統兩標舊有馬兵三百名馬匹草料需費甚多部議請照福州次第裁減鈕言於將軍拜音達禮謂地方形勢不同現在韶連土猺連年弗靖裁汰非宜遂據情咨覆兵部從之又標兵有汎防在東校場者百人素與土人弗洽會有無名屍身委校場口身被多傷土人聚衆喧譁是日值鈕閱看鳥槍甫至衆民紛跪馬前聲稱營衆挾讎殺人鈕卽召番禺令秦桂來相驗屍身有繩細迹兼帶海坦泥淖審係移屍誣賴將土人交縣

馬  
懲辦另緝正兇三十九年陞任荊州將軍

汪世臣漢軍正紅旗人世襲三等阿達哈哈番順治十八年由佐領隨鎮海將軍王國光赴潮州剿叛鎮蘇利戰於石井寨親冒矢石分奇兵繞出賊後賊大潰盡降其餘黨潮郡悉平世臣得一等功牌三留守潮州康熙七年擢京口協領三十八年簡放廣州右翼副都統四十一年連州八排猺人倡亂官軍進剿失利

上命正黃旗漢軍都統嵩祝往討卽授爲廣東將軍命世臣選旗兵六百率往連州江口防猺外竄未幾猺衆受撫世臣率旗兵會同提督料理安插事宜分

立卡堡於各隘口在軍備極勞瘁凱撤後於五十二年乞休旋卒奉

旨入祀名宦祠

何天培前廣州將軍拜音達禮子也幼在廣十一年能操廣州土音由騰生洊擢叅領康熙三十八年襲一等輕車都尉四十一年授廣州右翼副都統洞悉旗營利弊銳意興革四十三年北江石角圍決口其水直灌省垣從北門入城旗營男婦老幼避災城樓飢困乏食天培自捐資賑之水退籌撥旗庫餘款分給兵丁苦蓋傾塌房屋四十八年入



觀奏對在粵一切情形

上嘉其留心輯伍

賞戴花翎五十一年擢江甯京口將軍將啓行闔城老稚持香擁跪署前越三日始得行焉

陳昂福州民籍由外洋水師歷擢至碣石鎮總兵官因事罷秩効力軍門康熙五十五年澳門多盜番人因緣爲奸利時駐防廣州副都統兼管關務適缺出總督楊琳謀諸將軍管源忠引破格用人例

奏言陳昂熟悉洋務久爲閩廣番人所信服請照五十四年借用漢人總兵官何國雲爲右翼副都統

兼辦粵海關事例以昂接任得

旨俞允五十七年春到任在職兩載因病乞解任乃調江甯總兵官曹廷鑑代之廷鑑亦江南民籍也雍正初元

特調京旗副都統吳成龍來粵補授右翼副都統以旗缺向無用漢人之例前此六載中三用漢人皆一時權宜也

吳如譯漢軍正紅旗人由驍騎校從征青海積功雍正三年

簡放廣州左翼副都統先是北城百齡坊有合養馬棚一西城仙羊街北口有合養馬棚一每販馬客來旗

人日與狎熟往往有私賣借頂之弊如譯知之乃命驅逐馬販拆毀馬棚諭令各兵自畜馬有倒斃者報明右司扣存草料以足馬價於每歲專員赴柳州買補由是馬匹既足積弊悉除又酌定操演防守日期命各官輪班查閱並開列名單呈印房存記按日各有執事八旗境內一律整齊嚴肅焉七年調任京口副都統其操期防守章程大段至今未改

馬士傑漢軍正黃旗人雍正七年由叅領陞授廣州左翼副都統到任後察知兵丁疾苦莫甚於賠補馬匹時額兵三千每兵養馬一匹倘遇倒斃兵

則備價買補粵地水鹹草溲餒養稍失其宜輒多  
倒斃賠累難堪士傑與將軍議請在三分馬乾內  
扣存一分按部價二十一兩五錢之數存庫遇有  
賠補馬匹卽以此項買償旗兵庶免借貸貽累據  
情具

奏從之在任三載八旗甲兵咸戴其恩焉

毛克明漢軍正藍旗人雍正十年由廣州城守副  
將陞授廣州左翼副都統兼管粵海關稅課事務  
向例米船進口照收船料克明

奏言米穀爲民食所資與百貨不同請後豐熟之年  
照舊例征船料倘遇凶歉米船一到卽便放行並

免船料征額部覆如所請行十二年

奏稱粵東海關各口地面遼闊事務繁多弊端百出請歸總督兼管緣通省文武軍民均受總督統屬節制吏民不敢欺公玩法仍令監督專管征收則稅務肅清而弊端可杜疏入奉

旨允行十三年四月卒於官

曹瑞字輯五漢軍鑲藍旗人由世管佐領補本旗叅領軍政卓薦乾隆十三年陞授廣州右翼副都統時有東莞茶山堡貢生王亮臣者財雄一方武斷鄉里與楚南教匪王天化以邪術誘結黨羽通巨盜莫信豐等往劫增城縣古木墟營弁領兵捕

治斬十餘人擒亮臣等二十三人置增城縣獄亮臣賂禁卒越獄出集衆潛踞東增交界之藍糞山將以明年元旦闔城官赴

萬壽宮時起事預伏其黨省城中爲內應時將屆除夕瑞訶知之密白總督阿里衮阿里衮疾親率弁兵先期馳抵賊巢擒獲王亮臣及僞軍師王天化等而瑞率旗旅於省城內外搜獲其黨八十餘人悉置之法奉

旨嘉獎在粵二十有一年輯睦軍民多善政云

博清額號慎堂滿洲正黃旗人世襲恭誠侯爵乾隆四十八年任廣州滿洲副都統五十二年七月

臺灣林爽文倡亂奉

旨統帶駐防廣州滿漢兵千五百名赴臺征剿八月渡臺  
營彰化縣西賊聞廣州旗兵先至易之呼譟來撲  
我軍屹立不動賊遲疑未敢進我軍螺忽鳴槍箭  
齊發鼓譟直前賊驚駭大潰斬馘無算十一月大  
學士嘉勇公福康安及超勇公海蘭察之師至攻  
克大里杙賊巢乃命博清額領旗兵入山搜捕十  
二月克復諸羅縣城兩帥以其城當衝要命統旗  
兵守之後復領兵出戰於牛稠山斗六門集集埔  
等處大小十三戰皆有功五十三年賊平四月大  
軍遂凱旋焉

和興額滿洲鑲白旗人世襲二等阿達哈哈番乾隆六十年授廣州滿洲副都統嘉慶元年黔苗石柳鄧等盤踞普定水西諸砦四出焚劫勾連上林長官司苗衆擾及廣西泗城府界二年二月奉

旨命和興額統廣東綠營兵三千隨同嘉勇公福康安往剿卽

奏帶旗營官兵十五員名於五月三日啓行六月進攻黃草壩連克賊砦賊退屯龍洞值暑雨我兵騰山越礮奪其阿稿寨苗遂聚集棒鉞圍其地峭壁萬仞溪環峽阻僅東北一徑可通乃令兵分路攀躋自率親軍由正東深谷進賊併力拒守洞涵及



當文坪老巢而別出兵於新會嶺以誘我軍和興  
額遙見之縱馬越險厓衆兵鼓譟進登生擒巨目  
九人餘悉墜厓投礮死遂奪其老巢石柳鄧麥逃  
光咸死於陣良苗率冊亨之衆乞降事

聞賞給白玉攀指及大小荷包兩副其隨員常慶額爾登  
布

賞戴藍翎筆帖式劉秉寬甲兵施雄量等十三名各給功  
牌凱旋廣州明年夏奉

旨調任涼州副都統

黃文璟漢軍鑲紅旗人世襲伯爵嘉慶二年任廣  
州漢軍副都統時海寇劫掠沿海地方警報頻聞

文璟與將軍崇尚選兵一千隨時聽調又於城垣各汛添兵防守躬親巡察由是城防益嚴四民恃以無恐在任六載所定訓練防守諸章程至今猶遵守焉

善保滿洲正黃旗人世襲一等公爵嘉慶三年任廣州滿洲副都統好技擊選兵卒之少壯者日命學習優者遇缺拔補七年惠州會匪爛屐四陳阿本等倡亂勢甚猖獗總督吉慶往剿未能成功將軍書敬奉

旨領兵協剿而總督主撫旗兵到惠州一月卽還未幾總督自裁將軍相繼病歿善保權將軍事巡撫因病

在告訛言四起善保偕漢軍副都統黃文璟治城堡驗軍火選銳卒千人別爲一旅以備徵調省垣恃以安靖焉

成德蒙古正黃旗人嘉慶十年任廣州漢軍副都統性嚴毅時故相和珅家人周二胡六發廣州與披甲人爲奴二人尙有氣骸不遵其主約束成德訪聞立命杖之乃各歛跡孟冬北郊閱看鳥槍演打準頭村人爭拾鉛丸一人誤中槍斃村人譁然成德斥之曰定制官給鉛丸演放後官兵須拾繳七戒屢經示諭村民勿許闖入今不遵諭示冒險爭拾是自取其死也於兵丁何干耶村人乃散十

三年九月英吉利國兵目託言佛蘭西滋事藉保  
西洋人爲名領兵船擅入澳門住守數月總督吳  
熊光巡撫孫玉庭匿弗

奏俱革職成德與將軍陽春亦並未

奏報部議陽春降三級發往和闐効力成德調任哈  
密辦事大臣遂解任去

成瑞駐防西安滿洲正黃旗人嘉慶初由佐領隨  
西安將軍穆克登布剿捕三省教匪積功洊擢協  
領

賞戴花翎二十年陞任廣州滿洲副都統校閱槍隊輒曰  
戎事尙馬若憑步隊進退不能捷疾槍雖多僅堪

坐守耳乃令兵皆跨馬然槍初以爲難久遂熟習  
旗人有果六者以力雄人橫行西市人畏之如虎  
成瑞遣官捕治遣戍極邊由是强暴斂戢畏法在  
任數載無旗民鬪毆之訟焉故汀漳龍道徐榮未  
遇時在署司牘劄深敬禮之歲丙子諸生得在本  
省鄉試喜曰廣州駐防文風必自徐榮倡始矣榜  
發果售武鄉試錄科八旗應考者百餘人皆人材  
雄偉技藝嫻熟而癸酉開科僅中三名未免稍隘  
因商諸巡撫董教增是科滿洲中式三名漢軍中  
式四名次年俸滿入

觀甫至京疾終旅邸

花沙布滿洲鑲黃旗人世襲一等承恩公道光七  
年任廣州漢軍副都統每值挑選月缺將軍慶保  
見挽强者輒行拔補花沙布曰兵固尙强然人力  
强弱不齊今出缺之家衆口嗷嗷其子弟旣嫻騎  
射亦宜有以卹之不可盡棄也將軍善其言從之  
九年卒於任

左廷桐漢軍正黃旗人世襲一等子世管佐領道  
光十三年任廣州漢軍副都統十四年六月有英  
吉利國兵目律勞哩駕兵船來粵稱係察理貿易  
事務停泊虎門外有書呈總督總督盧坤命廣州  
協副將韓肇慶率洋商往見諭令遵照貿易章程

卽行退出外洋律嘮嘑弗聽廷桐遂與將軍總督  
會議派撥弁兵於省城內外澳門一帶嚴密防範  
及八月初五日忽有兵船二隻闖入內河各礮臺  
遙見之開礮轟擊而洋船亦發礮以應初九日駛  
至黃埔停泊將軍卽令廷桐督領左司協領及水  
師佐領選兵三百五十名乘駕緡船戰船抵獵德  
隘口會同綠營將弁駐紮防堵會洋商加律沼等  
訴稱律嘮嘑乃兵目不曉事體求恕免許之律嘮  
嘑遂於八月十九日出口其兵船亦於二十二日  
押出虎門官兵均撤歸伍十五年十二月調任杭  
州副都統

宗室英隆字菊人承襲奉恩將軍道光十七年

簡放廣州漢軍副都統二十一年春洋人因禁洋烟起釁  
攻陷虎門砂角威遠各礮臺兵船駛入內河省城  
戒嚴英隆與將軍阿精阿選調水師兵駐守鳳崗  
礮臺八旗兵分布城上晝夜防守英隆駐西城樓  
與士卒同甘苦時周巡堞閒溫語撫慰士卒無不  
感奮未幾奉

命押解革督琦善入都

裕瑞號集菴滿洲鑲黃旗人道光二十一年任廣  
州滿洲副都統時海氛方惡八旗兵皆登陴防守  
裕瑞到粵卽駐守西城樓軍書旁午羽檄交馳月



餘始定七月與將軍阿精阿大閱城垣添置火礮  
因永康臺孤懸北郊不可無輔乃於粵秀山左右  
增築二礮臺置兵守之二十二年攝理將軍印務  
二十三年春與水師提鎮周巡虎門察閱險要歸  
與制軍定議在娘鞋舊臺下增築威遠定遠三礮  
臺以阨東路於南沙小虎山前築上下鞏固兩礮  
臺以阨西路更於大橫檔舊臺下增築一臺以阨  
中路在任六載撫軍愛民威惠得宜後陞任江甯  
將軍

官文號秀峯漢軍正白旗人由內廷侍衛軍政卓  
異

簡放廣州漢軍副都統道光二十二年到任時海氛未靖日令偵卒四出探聽一切洋務民情無不周知二十七年洋人復伸入城之議揚言某日率大兵船至省直入省垣遠近各鄉紳耆聯絡率義勇來援省城先後至者凡十五鄉總督耆英命營將往閱盡收其軍械諸紳耆大失意官文聞之曰民爲邦本衆怒難犯乃備豬酒花紅往犒之且溫語獎勸於是紳耆咸感激赴轅歡謝而去二十七年調任荊州副都統後陞任荊州將軍湖廣總督平定粵匪晉大學士直隸總督事具

國史

烏蘭泰號遠芳姓索佳氏滿洲正紅旗人由火器營翼長道光二十七年

簡放廣州滿洲副都統性廉儉心思絕人嘗手製火攻機器皆精妙時八旗添設擡槍乃選士百餘人佐戚繼光鴛鴦陣法躬爲訓練咸豐初元粵西賊洪秀全等事起奉

命率親軍配軍火器械前往協剿旣至武宣察知軍營積弊及西省一切情形據實陳疏

上卽命烏蘭泰提督軍務是年七月以入山搜捕功及獨鼇山疊戰著績

賞戴花翎八月以新墟紫荆山之捷奉

旨給與軍功加三級閏八月以疊次進剿新墟賊勢窮蹙  
賞給都統銜旋又以續獲勝仗及平南簾縣等處剿擊竄  
匪不避艱險

賞穿黃馬褂二年正月賊由永安州竄桂林親督兵追至  
南門大戰至日暮左膝倏爲飛礮所傷急退保二  
塘自揣不起以兵柄授古州鎮秦定三口占遺疏  
付大帥賽尙阿遂卒軍民間之無弗失聲遺疏入  
上震悼一切卹典俱極優渥

賜諡壯武

庫克吉泰號仁龕駐防張家口蒙古正黃旗人兼  
通滿蒙漢文義少補諸生三試京兆弗售乃改就

旗員咸豐二年由防禦隨都統西凌阿南征齊豫  
積功

賞戴花翎陞補協領師次梁園署理河南城守尉並爲豫  
軍翼長九年陞補涼州副都統未到任改調廣州  
滿洲副都統值兵荒之後子弟半廢學業乃爲置  
塾督課繙譯制義兩途因才分訓不兩載登賢書  
捷南宮者皆有人焉又於政暇取二十一史約編  
繙譯

國書俾諸生講習後陞任西安將軍調熱河都統戰  
績尤著同治十二年卒

賜諡勤毅

駐粵八旗志卷十五終